

re d'Inghilterra per anni sei, et la pension solita di 60 milia scudi annual etc. La copia di tal capitoli scriverò di soto.

Da poi disnar, fo Consejo di X con la zonta, et scritto a Roma, et tutti era di bona voja per questo acordo fato, e lo tieneno certissimo. E molti si fa tuor doman podestà a Padoa, ch'è stà stridato, che prima non si volevano far tuor, *maxime* vechii.

Fo tolto un zovene venir a Consejo scritto a la balota, con prestar ducati 100 a la Signoria, sier Hironimo Querini qu. sier Francesco, qu. sier Marco.

Fo mandato a Padoa ducati 1000 imprestadi per sier Alvise Pixani.

In questo zorno, fo leto una lettera dil Zernovich, scrive a la Signoria, data in Montenegro, e si sottoscrive Sanzacho di Montenegro. Come lui fa bon officio col Signor a l'honorata Porta in far liberar quelle anime è prese de' christiani nostri subditi, e cussi doveria far *etiam* la Signoria nostra; perchè à pur inteso non si fa cussi; e scrive zercha le saline di Cataro.

*Dil capitano zeneral di campo.* Come à fato li 200 cavali sò lizieri, et però suplicha la Signoria li mandi danari etc.

Noto. Comparsono a la Signoria e a li Cai di X li commessi di quelli di Candia, sier Fabricio Corner qu. sier Michiel e sier Vincenzo Zorzi qu. sier Polo con domino Rigo Antonio loro avochato, suplicando fusse suspese le confiscation fate per sier Bernardo Barbarigo capitano e viceducha; et che zonto el sia qui, la Signoria e li Cai di X aldiria la cossa et terminerà quello li parerà; e cussi fo sospesa. E il brigantin, overo gripo, con dite lettere di suspension tornò in Candia.

237\* *A dì 6, Domenega, fo San Salvador.* Il Principe non fu in Colegio, sta bene; e l'altro zorno il Colegio fo a visitarlo; ma non pol caminar et sta sentado in camera.

*Di campo, dil capitano zeneral, fo lettere di ieri sera.* Come era zonto in campo de i nimici uno conte di Monte di Lione, vien di Spagna; et che attendono a far monstre di zente, e certissimo voleno far una grossa cavalchata con tutto il campo, et tuor honorata impresa; de che dubita non vadia le basse verso Cavarzere, Chioza etc.; et si provedi, perchè di Padoa lui provederà; e si mandi danari. In consonantia scrive sier Domenego Contarini provedador zeneral in campo.

Fo fato varii consulti in Colegio tra li savii, di proveder a Chioza, dubitano non vengino a bruser, atento è in lo aviso di ozi che i nimici hanno assa'

burchii, barche e burchiele preparate; et fo terminà armar. . . . barche di nave con . . . pezzi di artellaria grossa suso et mandarle a Chioza. *Item*, scritto a sier Alexandro Contarini sopracomito di galiasotil, è in Istria, ch'l vengi a Chioza, e cussi sier Tomà Moro capitano dil Golfo, che con la sua fusta l'à, vengi a Chioza. *Item*, scritto a sier Marco Gabriel podestà di Chioza, stagi provisto e fazi tuti quelli homeni stagino in ordine, et bisognandoli altro, scriva.

*Di Cavarzere, fo lettere di sier Andrea Bondimier capitano.* Come nostri andati con le barche in suso in l'Adexe, haveano preso uno burchio di formenti di la Signoria nostra, che i nimici l'aveano cargato per condurlo via, et ge lo hanno tolto et partito il formento tra quelli homeni lo presero et soldati, et voleano vender il burchio per partir li danari; el qual burchio è de' nostri subditi. Fo scritto, per la Signoria, non lo vendesse etc. Scrive dito capitano, quelle cosse è asegurate: vi è la barbota, barche 35, hanno fato la palifichata, et altre cosse, *ut in litteris*.

Da poi disnar, fo Gran Consejo, et fossemo numero. . . Fu posto prima, per i consieri, una parte lecta per il canzelier grando, terminata di meter ozi in cheba per aricordo di Vettor Bianco nodaro, atende a le voxe di far quelli di Pregadi ordinarii per 4 man di election, cussi come si fa li extraordinarii, con questo si cazino a uno a uno, *ut in parte*: la copia sarà posta qui avanti. Ave 3 non sincere, 370 di no, 1107 di si, e fu presa. E per mia opinion fu mal facto; è mala parte, e molti zoveni col titolo di Pregadi stenterà a romagnir, perchè saranno tolti da' vechii, e fu fragia. *Numerantur et non poderantur, ergo* etc.

In questo Consejo fu fato eletion di podestà a 238 Padoa; tolti tre: Sier Piero Querini el consier qu. sier Antonio 987, 438; sier Zuan Venier, fo Cao di X, qu. sier Francesco, 549, 869; sier Francesco Foscarei el consier da basso, qu. sier Filippo procurator, dopio, 549, 863. *Item*, tre dil Consejo di X: Sier Alvixe Grimani fo consier; sier Francesco Bernardo fo consier; sier Polo Capelo el cavalier fo secretario dil Consejo; et cazete molti con titolo di consieri e Cai di X. *Item*, fono fati 6 di Pregadi per 4 man di eletion. Tolti con titolo vero numero . . . e tra questi rimase: Sier Andrea Baxadona, à titolo di Pregadi, per danari, con titolo di aver mandà fanti 50 a la custodia di Padoa et è nuovo nè più rimaso di Pregadi, e fu soto sier Almorò Donado, qual à questo instesso titolo de homeni 50, et il penultimo Consejo rimase di la zonta.